

# Ur stourmerez dizaon aet da vaerez Barcelona

**Souezhadenn e dilennadeg-kêr Barcelona d'ar 24 a viz Mae. Berzh he deus graet listenn keodedel En Comú o tizhout ar muianiver keñverel er c'huzul-kêr. Diwar an diabarzh en deus heuliet Pau Faus koulzad kabaliñ Ada Colau, e penn ul listenn e-maez ar strolladoù boas, liammet ouzh emsav Podemos.**



© Marc Lozano

Pau Faus (a-zehoù) o filmañ Ada Colau ur wech anavezet disorc'h an dilennadeg.



Ar c'habaliñ e straedoù Barcelona.

## Petra eo listenn En Comú ?

Gwelet a raed e oa ur muianiver sokial er straedoù o c'houlenn cheñchamantoù met ne veze ket adkavet er mouezh-arc'hioù. Neuze, e miz Even 2014, o doa soñjet meur a strollad en em vodañ, strolladoù politikel eus an tu kleiz en o zouez hag ivez ar *Plataforma de los afectados por la hipoteca* (PAH) renet gant Ada Colau. Brudet e oa abalamour d'he stourm a-enep ar bankoù a argas an dud diouzh o lojeiz pa n'int ket gouest ken da baeañ ur c'hred diloc'h. Paliou fetis o deus izili En

Comú : paouez da argas an dud diouzh o lojeiz, ober lojeiz sokial e ranndiez goulo, rediañ an embregerezhioù a labour gant an ti-kêr da zoujañ ar reolennoù sokial...

## Penaos en deus gellet En Comú bodañ ar muianiver eus ar mouezhioù ?

Gounit e oa ar pal. Evit bezañ en tu enep, kentoc'h chom er straedoù. Skuizh eo tud Spagn gant ar bolitikourien a vicher. A-drugarez d'ur bennc'hoarierez dizaon, Ada hec'h anv, hon eus lakaet an tem sokial e kreiz an tabutoù. Hag heuliet omp bet gant an holl enebourien ! Amañ memes, e Katalonia, m'emañ kreñv an diviz war an emrenerezh hag an dizalc'hiezh. Etre miz Here ha miz C'hwevrer hon eus savet strolladoù e pep karter, strolladoù labour a zo bet savet gant tud prenet skiant ganto war an deskadurezh, stourmoù al labour, an endro, ar yec'hed, an treuzdougen... E miz C'hwevrer e oa kroget ar c'habaliñ, an hini kentañ evit 90 % ac'hanomp. Met ni a oar broudañ an dud, labourat dre emvodoù ha kaout ur sell skiantel war temoù ispisializet. Kalz

muioc'h a dud a oa en hon emvodoù eget e-barzh re al listennadoù all.

## Filmet ho peus ar c'habaliñ, peseurt skeudennoù kreñv ho peus dastumet ?

Enrollet am eus ivez Ada deiz ha deiz, evel ur seurt blog video, gant ar soñj sevel un teulfilm e diabarzh ar c'houlzad kabaliñ. Penaos eo tremenet eus ar stourm d'ar politikerezh ofisiel ? Penaos he deus diskoulmet an dislavar-se ? Ur redadeg diroll eo bet ar c'habaliñ evit izili ar strollad kehentiñ evel don. Fromus-kenañ eo bet ar fin peogwir ne ouie den ar pezh a c'hal-lfe c'hoarvezout. Da vare an trec'h hon eus tarzhet gant al levenez, ennomp eo savet al lorc'h. Bremañ eo Ada Colau alcaldessa Barcelona. Asantet eo bet met n'eus emglev gouarnamant ebet. Uhel eo ar spi ha ne vo ket aes bemdeiz.

### Komzoù dastumet gant Stéphanie Stoll

mouezharc'h(ioù) (b.) : boest(où) votiñ

Evit gouzout hiroc'h :

filmig gant En Comú : <http://bzh.me/barcelona>

**Siete días en la PAH**, ur film gant Pau Faus (spagnoleg istitiet e saozneg) : <http://bzh.me/7diaspah>



© El Caco

Ur skritell evit En Comú gant El Caco, *Movimiento de liberación gráfica de Barcelona*. Kreñv ha pouezus e oa identelezh grafek En Comú er c'habaliñ.